

Na caminda pa "Hey... ta Pasco!"

Esaki lo bira e celebracion musical mas grandi di fin di aña

ORANJESTAD (AAN): No tin nada di sconde mas! E ta conoci!

Diabierna, 18 di December, exactamente un siman prome cu Pasco, lo ta e dia pa Aruba celebra y festeha cu Edjean Semeleer, e gran concierto "Hey... ta Pasco!"

Siguiendo e celebracion di Edjean Semeleer su 15 aña den farandula, presentando proyectonan sumamente pop-

ular y atractivo, lo presenta e ultimo proyecto pa 2009 di e cantante aki.

Esaki lo ta e concierto cu asina hopi hende ta spera ansiosamente tur fin di aña. Un tradicion pa masha hende por drenta di berdad den e ambiente unico y special di Pasco.

E evento cultural/musical, mas grandi cu un artista local ta presenta riba su mes. Pa di

4 aña consecutivo, Edjean Semeleer lo presenta e gran concierto di gala "Hey... ta Pasco!". Desde comienso di Oktober, masha hopi hende ta pendiente y ansioso pa e evento aki. Awe, henter e pueblo di Aruba ta haya sa tur detaye.

Diaranson ultimo den un conferencia di prensa masha special, a anuncia porfin, tur detaye pa cu e gran concierto

di dia 18 di December proximo. E conferencia a cuminsa cu un sorpresa masha agradable pa tur presente. Edjean a anuncia cu e momento tabata propicio pa anuncia cu e instante ey e lo bautisa su produccion dimas nobo cu ta "Hey... ta Pasco!" volumen 6 y el a yama 3 madrina dilanti, cu a bira Jeanedy Semeleer, Ivone Andrade y Dhaddy Brokke cu tambe a



keda sumamente sorprendi.

Despues di esaki a sigui e conferencia di prensa. Edjean Semeleer a anuncia cu e anochi di 18 di December, Renaissance Convention Center ta worde transforma completamente den un fantasia Navideño, pa asina e por deleita tur presente cu un repertorio di kita sombre, compana pa e miho musiconan local bao direccion di Hildward Croes.

Hunto cune riba escenario, el a anuncia cu e aña aki lo tey un bes mas Jeanedy Semeleer cu lo deleita un y tur, specialmente su fanaticonan cu su tremendo voz. Por cierto Jeanedy tin un hit masha grandi tocando na tur e emisora na Aruba cu ta "Mi no por sin bo amor". Tambe Edjean a anuncia cu e otro invitadonan special lo ta nada mas y nada menos cu e duo legendario, stima pa miles di hende, "Dhaddy y Tony".

E duo sumamente popular aki, tambe ta forma parti importante di e celebracion di fin di aña. Nan cancionnan Navideño ta den memoria colectivo miles di nan fanaticonan na Aruba, Antiyas y Hulanda.

Esaki sigur ta un noticia masha grato pa tur fanático di "Hey... ta Pasco!". E idea semper di deleita e publico cu un variacion musical unico y masha atractivo, un produccion musical di calidad superior y un elenco artistico excelente, ta keda resalta.

DIARIO ta sigur cu e concierto aki lo sobrepasa tur expectativa. Mirando e popularidad inmenso di e concierto aki, y teniendo na cuenta e taya di artistanan manera Edjean Semeleer, Jeanedy Semeleer y "Dhaddy y Tony", por premira un sala completamente yen.

Edjean a informa cu asina mes cu el a anuncia gran parti di loke lo bay pasa dia 18 di December, cu lo tin sorpresanan masha grandi y agradable durante e anochi special y historico aki.